

Aalisarnermut aningaasaliissutitut immikkoortitat pillugit Inatsisartut inatsisaata allanngortinneqarnera pillugu Inatsisartut inatsisaat (Angallatinik pisoqqanik sequtserinissamut tapiisarnermik atuutilersitsineq aamma angallatinik nutarterinermi tapiissutitik qaffaaneq)

§ 1.

Aalisarnermut aningaasaliissutitut immikkoortitat pillugit Inatsisartut inatsisaat nr. 15, 20. november 2006-imeersumi imatut allannguisoqarpoq:

1. § 1, *imm. 1* imatut oqaasertaliorneqassaaq:

”Inatsisip siunertaa tassaavoq aalisarnermik inuussutissarsiortut ineriartornerinut siuarsarnerinullu tapiissuteqarnissaq, ilanngullugu inuussutissarsiummi peqataasunut nutaanut isersinnaanerup ajornannginnerulernissaa. Inatsimmi aamma siunertaaavoq sinerissamut qanittumi aalisarnermi aaqqissugaanikkut naleqqussaannermut atatillugu akuersissutit peerneqarnerisigut angallatit isaternissaannut tapiissutit atulersinnerisigut maannakkut siunissamilu pisaqarnissamut periarfissanut aalisariutit angissusaasa naleqqussarnissaat.”

2. Nutaatut § 1, *imm. 2* ikkunneqassaaq:

”*Imm. 2.* Inatsit aalisarnermik inuussutissarsiorterup inuiaqatigiinni sapinngisamik annertunerpaamik iluanaaruteqarnissaanut peqataassaaq ilanngullugu aalisarnermi naammassisaqarsinnaassuseq, unammillersinnaassuseq aamma aalisakkanik pisuussutitik aalisarsinnaassutsip ingerlaavartumik naleqqussarsinnaanera pitsaanerulersillugu kiisalu Kalaallit Nunaanni aalisarnermut iluaqutaasumik nutarsaanerit siuarsarlugit.”

3. Tamatuma kingorna § 1, *imm. 2* § 1, *imm. 3*-ngorpoq.

4. § 7, *imm. 1 nr. 2) nr. 3-tullu nutaatut ikkussaaq*) imatut oqaasertaliorneqassaaq:

”2) Raajat saniatigut aalisarnermi allani pisinermi nalingata tamarmiusup 40%-ia tikillugu.

”3) Piginnittut 20 %-imik tapiiffigineqarlutik angallatinik pisisimasut sulii allanik 20 %-inik tapiiffigitinnissamut qinnuteqarsinnaapput. Sulii allanik 20 %-inik tapiissutitik qaffaaneq atortussanik pisinermi atuutinnigilaq.”

5. § 9-mi *imm. 3* nutaatut ikkunneqassaaq:

”*Imm. 3.* § 7, *imm. 1, nr. 2* malillugu sulii allanik tapiissuteqarnermi 10 %-imik nammineq aningaasaliissuteqarnissaq piumasaqaatigineqassaaq.”

6. *Kapitali 6* tamatuma kingorna kapitali 7-ingorpoq aamma *kapitali 7* kapitali 8-ingorpoq.

7. § 14 tamatuma kingorna § 18-ingorpoq, § 15 § 19-ingorpoq aamma § 16 § 20-ingorpoq.

8. Kapitali 6-imi qulequtaq nutaaq ikkunneqassaaq:

“Aalisarnermi aalisariutinik isaterinissamut tapiissutit pillugit aalajangersakkat.”

9. ”Nutaatut § 14-itut ikkunneqassaaq:

”§ 14. Sinerissamut qanittumi aalisarnermi aalisariutinik isaterinermit Naalakkersuisut

tapiissuteqarsinnaapput, siunertamut pineqartumut ukiumut aalajangikkamut aningaasanut inatsimmi immikkoortinneqarsimasut sinaakkuserneqarnerisa iluannit.

Imm. 2. Tapiissutit tunniunneqarsinnaapput angallat

1) umiarsuarnik nalunaarsuiffup aalisariutit pillugit nalunaarsuutaani imaluunniit Angallatit nalunaarsorneranni ilaassaaq, aammalu Aalisarnermut, Piniarnermut Nunalerinermullu Aqutsisoqarfiup inuussutissarsiutigalugu aalisarnermik ingerlatsinissamut akuersissuteqartutut angallatit pillugit nalunaarsuiffiani nalunaarsorsimassalluni,

2) taassuma uuttuutaa malillugu 5 BRT imaluunniit 8 BT qaangerlugu usitussuseqassaaq aamma 75 BRT imaluunniit 120 BT inorlugit usitussuseqassalluni,

3) ukiunik 25-nik taakkuluunniit sinnerlugit pisoqaassuseqassaaq,

4) ukiuni kingullerni marlunni aalisarsinnaanermut akuersissutigineqartut pissarsiat annikinnerpaamik 50 %-ii aalisarsimassavai, aamma

5) qinnuteqaatit tunniunneqarnerani ingerlanissaminut piareersimassaaq.

Imm. 3. Qinnuteqaatit tunniunneqarneranut piffissaq aamma qinnuteqartut arlallit tamarmilluunniit isaterinissamut tapiissutisinissamut piumasaqaatinik naammassinnikkaluarpataluunniit § 17, imm. 1-imi taaneqartup aalajangersimasumik naliliineq aallaavigalugu tapiissuteqarnissamut aningaasat qaqugukkulluunniit uninngasuutigineqartut eqqarsaatigalugit aamma isaterineq tapiissuteqarnissamullu naleqqussuseq aallaavigalugu qinnuteqartut ataatsimiititaliap tullerriaarsinnaavai.

Imm. 4. Imm. 3-mi taaneqartoq pingaarnersiuneq makku tunngavigalugit piumasaqaatigineqassapput:

1) angallatip pisoqaassusia usitussusialu

2) siusinnerusukkut pisassiissutinit aalisarnermit pisaqarsimanerit

3) angallatit amerlassusaat imaluunniit sumiiffinni aalisarsinnaanermut akuersissutit, imaluunniit

4) Aalisarnermi naammassisat aalisakkat suussusaanut agguaataarlugit”.

10. Nutaatut § 15-itut ikkunneqassaaq:

”§ 15. Tapiissutit annertussusissaat aningaasatut tunngaviusussatut aamma angallatip BRT-imut imaluunniit BT-mut ataatsimut usitussusianut aningaasat aalajangersimasut Naalakkersuisunit aalajangersarneqartut aallaavigalugit naatsorsorneqassapput. Ukiut tamaasa tapiissutit annertussusaat 5%-imik ikilisinneqassapput angallatip pisoqaassusaa minnerpaamik ukiunik 25-nit pisoqaaneruppat.

Imm. 2. Isaterinissamut tapiissutit annerpaamik sillimmasiinerup nalingata 75 %-iata nalinganut annertussuseqarsinnaapput, sakkuutit ilanngunnagit.

Imm. 3. Sillimmasiinermi aningaasat, isaterinissamut qinnuteqarnermiit ukioq ataaseq sioqqullugu angallammi imaluunniit motorimi ajoquserneq pissutigalugu tunniunneqarsimasut tapiissutit tunniunnerini ilanngaatigineqassapput, sillimmasiinermi aningaasat angallatip iluarsarneranut atorineqarsimangippata. Aammattaaq sillimmasiinermi aningaasat qinnuteqareernerup kingorna ajoquserneq pissutigalugu tunniunneqartut, kisiannili tapiissutit tunniunneqarnissaat sioqqullugu tunniunneqartut, ilanngaatigineqassapput.”

11. Nutaatut § 16-itut ikkunneqassaaq:

”§ 16. Tapiissutit akilernerini angallat piviusumik isaterneqassaaq.

Imm. 2. Isaterinissamut tapiissutit tunniunneqarnerini aalisarsinnaanermut akuersissut aamma inuussutissarsiutigalugu aalisarnernut akuersissutit tamarmik atorunnaassapput. Angallat umiarsuit nalunaarsuiffiannit, aalisariutit pillugit nalunaarsuiffimmit, imaluunniit Angallatit nalunaarsuiffiannit, aamma Aalisarnermut, Piniarnermut Nunalerinermullu Aqutsisoqarfiup inuussutissarsiutigalugu aalisarnermik ingerlatsinissamut akuersissuteqartutut angallatit pillugit nalunaarsuiffianit peerneqassaaq.”

12. Nutaatut § 17-itut ikkunneqassaaq:

”§ 17. Isaterinissamut tapiiffigitinnissamut qinnuteqaatit suliami aalajangiisussamit ataatsimiititaliamit Naalakkersuisunit pilersinneqartumit inaarutaasumik allaffissornikkut suliarineqassapput.

Imm. 2. Naalakkersuisut toqqassavaat ataatsimiititaliamut ilaasortat tallimaasut, tassunga ilanngullugu siulittaasoq. Ilaasortat sisamat, taakkunanga KNAPK-mit marluk, Kalaallit Nunaanni Sulisitsisut Kattuffianiit ataaseq imaluunniit kattuffimmit assigisaanit kiisalu Aalisarnermut, Piniarnermut Nunalerinermullu Naalakkersuisoqarfimmiit ataaseq, inassuteqarnikkut toqqarneqassapput. Ataatsimiititaliaq allatoqarnikkut Naalakkersuisunit sullinneqassaaq. Ataatsimiititaliap suleriaasissani suliarissavaa, taannali Naalakkersuisunit akuerineqassaaq.

Imm. 3. Isaterinissamut tapiissutit pillugit §§ 14, 15 aamma 16-imi malittarisassat tunngavigalugit Naalakkersuisut malittarisassanik erseqqarinnerusunik aalajangersaassapput, tassunga ilanngullugu qinnuteqaatit, tapiissuteqarnissamut piumasaqaatit, tapiissutinik naatsorsuineq, annertussusiliineq aammalu tapiissutinik tunniussineq, paasissutissat nakkutilliinerlu pillugit aammalu tapiissutit il.il. atorunnaarsinneqarsinnaaneri utertillugillu akilerneqarsinnaaneri pillugit.

Imm. 4. Isaterinissamut tapiissutit utertinnissaat pillugit aalajangersakkanut § 12, nr. 1 aamma 4-mi aalajangersakkat atuupput.”

13. § 19, *imm. 1 nr. 2* imatut oqaasertaliorneqassapput:

”2) Pisortanut eqqortuunngitsunik paasissutissiineq, takuuk §§ 4 aamma 14.”

14. § 19, *imm. 1 nr. 3* imatut oqaasertaliorneqassapput:

“§§ 11 aamma 16 naapertorlugit maleruagassatut aalajangerneqartuni piumasarineqartunut naammassinnginninneq.”

15. Inatsimmi tamani oqaaseq “Landsstyret” allangortinneqassaaq “Naalakkersuisut”-nut.

16. Inatsimmi tamani “Namminersornerullutik Oqartussat” allangortinneqassaaq “Namminersorlutik Oqartussat”-nut.

§ 2.

Inatsisartut inatsisaat ulloq 1. januar 2010-mi atuutilissaaq.

Namminersorlutik Oqartussat, ulloq 2. december 2009

Kuupik Kleist

Ane Hansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut